

„(11) Odlukom iz stava 10 ovog člana propisuje se način određivanja i utvrđivanja pripravnosti, raspored pripravnosti, način pozivanja službenika, odnosno namještenika radi izvršenja poslova i radnih zadataka, način obavještanja organa javne uprave i institucija i službenika, odnosno namještenika o pripravnosti i druga pitanja u vezi s ovim posebnim oblikom rada.“

Član 15

U članu 69 stav 4 se briše.

Član 16

U članu 80 stavu 3 riječi: „mandatnu poziciju, koja je vezana za mandat gradonačelnika“, zamjenjuju se riječima: „radno mjesto vezano za mandat gradonačelnika“ i u stavu 6 riječi: „mandatnoj poziciji vezanoj za mandat gradonačelnika“ zamjenjuju se riječima: „radnom mjestu vezanom za mandat gradonačelnika“.

U istom članu, u stavovima 1, 2, 3, 4, 5, 7 i 10, riječi: „rukovodeći službenik“ zamjenjuju se riječima: „rukovodeći državni službenik, odnosno rukovodeći javni službenik“.

Član 17

U članu 86 iza stava 4 dodaje se novi stav 5 koji glasi:

„(5) Izuzetno od stava 2 ovog člana, naknada za rad disciplinskog tužioca i zamjenika disciplinskog tužioca utvrđuje se u iznosu od 20% (dvadeset posto) od prosječne bruto plate zaposlenih u organima javne uprave, a naknada za rad Disciplinske komisije utvrđuje se u iznosu od 15% (petnaest posto) od prosječne bruto plate zaposlenih u organima javne uprave.“

Dosadašnji stavovi 5 i 6 postaju stavovi 6 i 7.

Član 18

U članu 92 stav 6 mijenja se i glasi:

„(6) Disciplinskog tužioca i njegovog zamjenika imenuje gradonačelnik iz reda diplomiranih pravnika zaposlenih u javnoj upravi Distrikta.“

Član 19

U članu 97 stavu 3 riječi: „tačkama a) i b)“, se brišu.

Član 20

U članu 113 stav 1 mijenja se i glasi:

„(1) Prekobrojnost nastaje kao posljedica ukidanja pojedinih organa javne uprave, odnosno organizacionih jedinica u sastavu organa javne uprave ili radnih mjesta radi smanjenog obima poslova kao i u drugim slučajevima propisanim ovim ili posebnim zakonom koji utiču na promjenu radno-pravnog statusa službenika, odnosno namještenika.“

Član 21

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-464/18

Brčko, 30. 10. 2018. godine

PREDSJEDNIK
SKUPŠTINE BRČKO DISTRIKTA BiH
Esed Kadrić, s. r.

588

Na osnovu člana 31 stava 1 tačke n) Poslovnika o radu Skupštine Brčko distrikta BiH (Službeni glasnik Brčko distrikta BiH, brojevi: 17/08, 20/10, 4/13 i 31/13), donosim

ODLUKU **O PROGLAŠENJU ZAKONA O DOPUNI ZAKONA O** **ZDRAVSTVENOJ ZAŠTITI U BRČKO DISTRIKTU BOSNE I** **HERCEGOVINE**

Član 1

Proglašavam Zakon o dopuni Zakona o zdravstvenoj zaštiti u Brčko distriktu Bosne i Hercegovine, koji je usvojila Skupština Brčko distrikta BiH na 36. redovnoj sjednici održanoj 14. novembra 2018. godine.

Član 2

Ova odluka bit će objavljena u Službenom glasniku Brčko distrikta BiH.

Broj: 01.1-02-55/18

Brčko, 14. 11. 2018. godine

PREDSJEDNIK
SKUPŠTINE BRČKO DISTRIKTA BiH
Esed Kadrić, s. r.

Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH na 36. redovnoj sjednici održanoj 14. novembra 2018. godine, usvaja

ZAKON **O DOPUNI ZAKONA O ZDRAVSTVENOJ ZAŠTITI U BRČKO** **DISTRIKTU BOSNE I HERCEGOVINE**

Član 1

U Zakonu o zdravstvenoj zaštiti u Brčko distriktu Bosne i Hercegovine (Službeni glasnik Brčko distrikta Bosne i Hercegovine, brojevi: 38/11, 9/13, 27/14 i 3/15), u članu 128 iza riječi: „nostrifikovana“ dodaje se sljedeći tekst: „ili priznata od strane nadležnog organa u Bosni i Hercegovini“.

Član 2

Ovaj zakon stupa na snagu osmog dana od dana objavljivanja u Službenom glasniku Brčko distrikta Bosne i Hercegovine.

Broj: 01-02-473/18

Brčko, 14. 11. 2018. godine

PREDSJEDNIK
SKUPŠTINE BRČKO DISTRIKTA BiH
Esed Kadrić, s. r.

589

Na osnovu člana 31 stava 1 tačke n) Poslovnika o radu Skupštine Brčko distrikta BiH (Službeni glasnik Brčko distrikta BiH, brojevi: 17/08, 20/10, 4/13 i 31/13), donosim

ODLUKU **O PROGLAŠENJU ZAKONA O IZMJENAMA I DOPUNAMA** **KRIVIČNOG ZAKONA BRČKO DISTRIKTA BOSNE I** **HERCEGOVINE**

Član 1

Proglašavam Zakon o izmjenama i dopunama Krivičnog zakona Brčko distrikta Bosne i Hercegovine, koji je usvojila Skupština Brčko distrikta BiH na 36. redovnoj sjednici održanoj 14. novembra 2018. godine.

Član 2

Ova odluka bit će objavljena u Službenom glasniku Brčko distrikta BiH.

Broj: 01.1-02-56/18

Brčko, 14. 11. 2018. godine

PREDSJEDNIK
SKUPŠTINE BRČKO DISTRIKTA BiH
Esed Kadrić, s. r.

Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH na 36. redovnoj sjednici održanoj 14. novembra 2018. godine, usvaja

Z A K O N
O IZMJENAMA I DOPUNAMA KRIVIČNOG ZAKONA
BRČKO DISTRIKTA BOSNE I HERCEGOVINE

Član 1

U Krivičnom zakonu Brčko distrikta Bosne i Hercegovine (Službeni glasnik Brčko distrikta BiH, broj 33/13 - prečišćeni tekst i brojevi 26/16 i 13/17) član 41a briše se.

Član 2

U članu 44 stav 1 mijenja se i glasi:

„(1) Kad sud odmjeri i izrekne kaznu zatvora do jedne godine, može na prijedlog optuženog ili njegovog branioca, odrediti da se tako izrečena kazna zamijeni radom za opće dobro na slobodi.“

Član 3

U članu 55 iza stava 2 dodaju se stavovi 3 i 4, koji glase:

(3) Ako produženo krivično djelo obuhvata različite oblike istog djela, produženo krivično djelo će se pravno kvalificirati kao najteže od tih krivičnih djela.

(4) Krivično djelo koje nije obuhvaćeno produženim krivičnim djelom u pravosnažnoj sudskoj presudi predstavlja posebno krivično djelo ili ulazi u sastav posebnog krivičnog djela.

Dosadašnji stav 3 postaje stav 5.

Član 4

U članu 71 iza tačke *d* dodaju se tačke: *e, f, g i h*, koje glase:

„e) zabrana prisustvovanja određenim sportskim priredbama;

f) zabrana približavanja i komunikacije s određenim licem;

g) obavezan psihosocijalni tretman;

h) udaljenje iz zajedničkog domaćinstva.“

Dosadašnja tačka *e* postaje tačka *i*.

Član 5

Iza člana 77 dodaju se članovi 77a, 77b, 77c i 77d, koji glase:

„Zabrana prisustvovanja određenim sportskim priredbama

Član 77a

(1) Sud može učiniocu krivičnog djela izreći mjeru zabrane prisustvovanja određenim sportskim priredbama kada je to neophodno radi zaštite opće sigurnosti.

(2) Mjera iz stava 1 ovog člana izvršava se na taj način što je učinilac krivičnog djela dužan da se neposredno prije početka vremena održavanja određenih sportskih priredbi lično javi službenom licu u policijskoj stanici na području na kojem se učinilac zatekao i da boravi u njihovim prostorijama tokom održavanja sportske priredbe.

(3) Sud određuje trajanje mjere iz stava 1 ovog člana, koje ne može biti kraće od jedne niti duže od pet godina, računajući od dana pravosnažnosti odluke, s tim da se vrijeme provedeno u zatvoru ne uračunava u vrijeme trajanja ove mjere.

(4) Ako sud izrekne uslovnu osudu, sud će odrediti da će se ta osuda opozvati, ako učinilac prekrši zabranu prisustvovanja određenim sportskim priredbama, odnosno ako ne izvrši dužnost iz stava 2 ovog člana.

(5) Zakonom se može odrediti obavezna zabrana prisustvovanja određenim sportskim priredbama.

Zabrana približavanja i komunikacije s određenim licem

Član 77b

(1) Učiniocu krivičnog djela s elementima nasilja sud može za određeno vrijeme zabraniti približavanje oštećenom na određenoj udaljenosti, zabraniti pristup u prostor oko mjesta stanovanja ili mjesta rada, i zabraniti dalje uznemiravanje oštećenog odnosno dalju komunikaciju s oštećenim, ako se opravdano može očekivati da bi dalje vršenje takvih radnji od učinioca krivičnog djela bilo opasno po oštećenog.

(2) Mjerom sigurnosti iz stava 1 ovog člana može se učiniocu krivičnog djela zabraniti približavanje i komunikacija s drugim licem ukoliko bi takvo ponašanje učinioca predstavljalo psihičko uznemiravanje oštećenog.

(3) Sud određuje trajanje ove mjere sigurnosti koje ne može biti kraće od šest mjeseci, niti duže od dvije godine, računajući od dana pravosnažnosti presude, s tim da se vrijeme provedeno na izdržavanju kazne zatvora, odnosno u zdravstvenoj ustanovi za čuvanje i liječenje ne uračunava u vrijeme trajanja ove mjere.

(4) Ako učinilac tokom vremena provjeravanja određenog uslovnog osudom prekrši zabranu približavanja ili komunikacije iz st. 1 ili 2 ovog člana, sud će opozvati uslovnu osudu i izreći utvrđenu kaznu.

(5) Ako učinilac za vrijeme uslovnog otpusta prekrši zabranu približavanja ili komunikacije iz st. 1 ili 2 ovog člana, uslovni otpust će se opozvati.

Obavezan psihosocijalni tretman

Član 77c

(1) Učiniocu koji je učinio krivično djelo s elementima nasilja sud može izreći obavezan psihosocijalni tretman, ako na osnovu ranijeg života učinioca i psihičkih karakteristika njegove ličnosti utvrdi da postoji opasnost da će ponoviti takvo ili slično djelo i da je radi otklanjanja ove opasnosti potreban psihosocijalni tretman.

(2) Sud određuje trajanje ove mjere sigurnosti koje ne može biti kraće od šest mjeseci, niti duže od dvije godine, računajući od dana pravosnažnosti odluke.

(3) Ako je ova mjera izrečena uz kaznu zatvora, izvršava se u ustanovi za izdržavanje kazne zatvora. Ako osuđeni, nakon puštanja na uslovni otpust, ne nastavi s izvršavanjem ove mjere u drugoj odgovarajućoj ustanovi, uslovni otpust će se opozvati.

(4) Ako se učinilac tokom vremena provjeravanja određenog uslovnog osudom ne podvrgne obaveznom psihosocijalnom tretmanu, sud će opozvati uslovnu osudu i izreći utvrđenu kaznu.

Udaljenje iz zajedničkog domaćinstva

Član 77d

(1) Učiniocu koji je izvršio krivično djelo s elementima nasilja prema licu s kojim živi u zajedničkom domaćinstvu sud može izreći mjeru sigurnosti udaljenja iz zajedničkog domaćinstva ako postoji opasnost da će učinilac ponovo izvršiti nasilje prema članu zajedničkog domaćinstva i da je radi otklanjanja ove opasnosti neophodno njegovo udaljenje iz zajedničkog domaćinstva.

(2) Sud određuje trajanje ove mjere koje ne može biti kraće od šest mjeseci, niti duže od dvije godine, a u vrijeme njenog trajanja ne uračunava se vrijeme provedeno na izdržavanju kazne zatvora ili u ustanovi za liječenje.

(3) Ako osuđeni ne postupi po mjeri sigurnosti ili prekrši ovu mjeru, uslovni otpust će se opozvati.

(4) Učinilac krivičnog djela kojem je izrečena ova mjera sigurnosti dužan je da u prisustvu policijskog službenika odmah po pravosnažnosti presude napusti stan, kuću ili neki drugi stambeni prostor koji čini zajedničko domaćinstvo sa žrtvom.

(5) Lice koje je udaljeno iz domaćinstva dužno je da doprinosi izdržavanju lica koja su ostala u domaćinstvu, na način kako mu to odredi sud.“

Član 6

U članu 78 iza stava 4 dodaje se stav 5, koji glasi:

“(5) Oduzeti predmeti i sredstva postaju vlasništvo Brčko distrikta.“

Član 7

Iza člana 179 dodaju se članovi 179a i 179b, koji glase:

„Mučenje i drugi oblici surovog i nečovječnog postupanja

Član 179a

(1) Službeno lice u institucijama Brčko distrikta Bosne i Hercegovine ili bilo koje drugo lice koje djeluje u svojstvu službenog lica u institucijama Brčko distrikta Bosne i Hercegovine, po naredbi, na podsticaj ili s izričitim ili prešutnim pristankom službenog lica u institucijama Brčko distrikta Bosne i Hercegovine ili bilo kojeg drugog lica koje djeluje u svojstvu službenog lica u institucijama Brčko distrikta Bosne i Hercegovine, koje nanese drugome fizičku ili duševnu bol ili tešku fizičku ili duševnu patnju, s ciljem da od njega ili trećeg lica dobije informaciju ili priznanje ili s ciljem da se kazni za krivično djelo koje je počinio ili se sumnja da je počinio on ili treće lice ili

koje ga zastrašuje ili prisiljava iz bilo kojeg drugog razloga zasnovanog na bilo kojoj vrsti diskriminacije, kaznit će se kaznom zatvora od jedne do osam godina.

(2) Kaznom iz stava 1 ovog člana kaznit će se i službeno lice u institucijama Brčko distrikta Bosne i Hercegovine ili bilo koje drugo lice koje djeluje u svojstvu službenog lica u institucijama Brčko distrikta Bosne i Hercegovine koje je naredilo ili podsticalo na počinjenje krivičnog djela ili dalo izričit pristanak ili znalo i prešutno se saglasilo s počinjenjem krivičnog djela iz stava 1 ovog člana.

Prisilni nestanak 179b

(1) Službeno lice u institucijama Brčko distrikta Bosne i Hercegovine ili bilo koje drugo lice koje djeluje u svojstvu službenog lica u institucijama Brčko distrikta Bosne i Hercegovine ili po naređenju ili na podsticaj ili s izričitim ili prešutnim pristankom službenog lica u institucijama Brčko distrikta Bosne i Hercegovine, koje drugo lice zatvori, drži zatvoreno ili ga na drugi način liši slobode kretanja i pri tome odbije da prizna da ga je lišilo slobode ili skriva informacije o sudbini ili lokaciji tog lica, stavljajući ga tako izvan zaštite zakona, kaznit će se kaznom zatvora od jedne do deset godina.

(2) Kaznom iz stava 1 ovog člana kaznit će se i službeno lice u institucijama Brčko distrikta Bosne i Hercegovine koje je naredilo ili podsticalo ili dalo izričit pristanak ili znalo i prešutno se saglasilo s počinjenjem krivičnog djela iz stava 1 ovog člana.

(3) Ko je kao pretpostavljeni znao ili je svjesno zanemario informaciju da je njemu podređeni počinitelj počinio krivično djelo iz stava 1 ovog člana ili da se nalazi pred počinjenjem krivičnog djela, a bio je odgovoran i imao kontrolu nad postupcima koji su se odnosili na počinjenje krivičnog djela iz stava 1 ovog člana, pa nije preduzeo sve potrebne i razumne mjere u njegovoj moći da spriječi ili onemogući izvršenje krivičnog djela iz stava 1 ovog člana ili da to pitanje preda državnim vlastima radi istrage i krivičnog gonjenja, kaznit će se kaznom zatvora od jedne do deset godina.

(4) Činjenica da je neko lice postupalo po naređenju vlade ili nekog njemu nadređenog lica ne oslobađa ga krivice, ali može uticati na ublažavanje kazne."

Član 8

U članu 200 u stavu 1 riječi: "jedne" zamjenjuju se riječju: "tri".

Član 9

U članu 201 u stavu 1 riječi: „jedne do osam“ zamjenjuju se riječima: "dvije do deset".

U stavu 2 i stavu 3 riječi: "jedne do deset " zamjenjuju se riječima: "tri do petnaest".

U stavu 5 riječi: "jedne do deset" zamjenjuju se riječima: "najmanje pet".

U stavu 6 riječi: " tri godine" zamjenjuju se riječju: "deset".

Član 10

U članu 204 u stavu 1 riječi: „jedne do osam“ zamjenjuju se riječima: "dvije do deset".

U stavu 2 riječi: "tri " zamjenjuju se riječju: "osam".

U stavu 3 riječi: „od jedne do deset" zamjenjuju se riječima: "od pet do petnaest".

U stavu 4 riječi: "pet" zamjenjuju se riječju: "osam".

U stavu 5 riječi: "pet" zamjenjuju se riječju: "deset".

Član 11

U članu 218 u stavu 1 riječi: „jedne" zamjenjuju se riječju: "tri".

Član 12

Iza člana 235 dodaje se član 235a koji glasi:

„Zloupotreba položaja odgovornog lica

Član 235a

(1) Odgovorno lice koje iskorištavanjem svog položaja ili ovlaštenja, prekoračenjem granica svog ovlaštenja ili nevršenjem svoje dužnosti pribavi sebi ili drugom fizičkom ili pravnom licu protivpravnu korist ili drugom nanese imovinsku štetu, ukoliko time nisu ostvarena obilježja nekog drugog krivičnog djela, kaznit će se kaznom zatvora od šest mjeseci do tri godine.

(2) Ako je izvršenjem djela iz stava 1 ovog člana pribavljena imovinska korist koja prelazi iznos od 10.000 KM, učinilac će se kazniti kaznom zatvora od jedne do pet godina i novčanom kaznom, a ako taj iznos prelazi 50.000 KM, kaznom zatvora od dvije do deset godina."

Član 13

U članu 246a mijenjaju se naziv člana i član i glase:

„Primanje dara ili druge koristi u obavljanju privredne ili druge djelatnosti Član 246a

(1) Ko pri obavljanju privredne ili druge djelatnosti za sebe ili drugog, neposredno ili posredno, zahtijeva ili primi poklon ili drugu korist ili ko primi obećanje poklona ili druge koristi da zaključi ugovor ili postigne poslovni dogovor ili pruži uslugu ili da se uzdrži od takvog djelovanja ili kršenjem drugih dužnosti u obavljanju privredne ili druge djelatnosti na štetu ili u korist subjekta privrednog poslovanja ili drugog pravnog lica za koje ili u kojem radi ili drugog lica, kaznit će se kaznom zatvora od jedne do osam godina.

(2) Učinilac djela iz stava 1 ovog člana koji posle zaključenja ugovora ili postizanja poslovnog dogovora ili posle pružene usluge ili uzdržavanja od takvog djelovanja, za sebe ili drugog zahtijeva ili primi poklon ili drugu korist ili prihvati obećanje poklona ili druge koristi, kaznit će se kaznom zatvora od šest mjeseci do tri godine.

(3) Primljeni poklon i imovinska korist oduzet će se."

Član 14

U članu 246b mijenjaju se naziv člana i član i glase

„Davanje dara ili druge koristi u obavljanju privredne ili druge djelatnosti Član 246b

(1) Ko neposredno ili posredno učini, ponudi ili obeća poklon ili drugu korist licu da ono pri obavljanju privredne ili druge djelatnosti, zaključi ugovor ili postigne poslovni dogovor ili pruži uslugu ili se uzdrži od takvog djelovanja ili krši druge dužnosti u obavljanju privredne ili druge djelatnosti na štetu ili u korist subjekta privrednog ili drugog poslovanja za koje ili u kojem radi ili na štetu ili u korist drugog pravnog ili fizičkog lica ili ko posreduje pri ovakvom davanju poklona ili druge koristi, kaznit će se kaznom zatvora šest mjeseci do pet godina.

(2) Učinilac djela iz stava 1 ovog člana koji je dao poklon ili drugu korist na zahtjev lica da ono pri obavljanju privredne ili druge djelatnosti zaključi ugovor, postigne poslovni dogovor, pruži uslugu ili krši dužnost, a djelo je prijavio prije nego što je saznao da je ono otkriveno, može se osloboditi od kazne.

(3) Dati poklon i imovinska korist iz stavova 1 i 2 ovog člana oduzet će se."

Član 15

U članu 346 mijenjaju se naziv člana i član i glase:
„Odavanje istovjetnosti svjedoka pod zaštitom

Član 346

Sudija suda u Brčko distriktu Bosne i Hercegovine ili drugo službeno lice koje je sudjelovalo u ispitivanju svjedoka pod zaštitom u krivičnom postupku koji se vodi po zakonu Brčko distrikta Bosne i Hercegovine, koje neovlaštenom licu učini pristupačnim podatke o istovjetnosti svjedoka pod zaštitom, kaznit će se kaznom zatvora od šest mjeseci do pet godina."

Član 16

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Član 17

Zadužuje se Zakonodavna komisija Skupštine Brčko distrikta Bosne i Hercegovine da utvrdi prečišćeni tekst Krivičnog zakona Brčko distrikta Bosne i Hercegovine u roku 90 dana od dana objavljivanja ovog zakona u Službenom glasniku Brčko distrikta BiH.